



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma : Tir Yimym

tir_yimym

tir yimym

TAPAK 7

**Tourism sector asentenshitsü atema
PM Modi leniba nung senden amen**

**Russia tir Putin-i Kursk
tesem semdang**

VOL. XXII ISSUE NO. 217 (ADOK 217)

DIMAPUR

YANGTEPNÜ (THURSDAY)

MONUPII (MAY) 22, 2025

₹ 5.00

State sorkari shishilembabaren nung tim masüba mazüoker: BAN

Dimapur, May 21, 2025 (TYO): Nagaland kübok Town aser Municipal Council balala nung tim masüba inyakyim liaka state sorkar kecha meinyakba atema tebilemtsü abener ta Business Association of Nagas (BAN)-i metetdaksüogo.

Town aser Municipal Council nung tetoktepba melii tenders agütsüba aser iba ajanga teshimtet nübotemi temeten anguba atema April 29, 2025 nü state sorkar dangi shidi ka zülüogo ta BAN-i ashi.

Ibala inyakyim ya trade principles alema lir aser local market nung monopolization asür. Sorkari mapa inyaksü mulunga agizükba atema tenüngsang agütsür saka mapa meinyakba ajanga tetsükdaksü ajuruba ajiteter aser tim masüba tasü ita inyaker ta BAN-isa metetdaksü.

Shishilembartem kar ajangzüktsü atema inyakyim lateta aliba aser ozüng alema syndicate systems tiyongtsü nung mejebber aser anaprong ajanga Nagaland nung shishilembabaren nung timtem agütsür. Tatem nung iba ajanga public-i dang khuret abener kechiyong parnoki jenjang tasak asüyonga alitsüsa akümer, ta BAN-i ashi.

"Public rejutem ya kija kar

ajangzükdaksütsü atema masü saka nübortem tenzüktsü atema lir. Anungji khuret tuluba küma maodang aser Nagaland nung shishilembabaren merakadang mapa inyaksü ayongzükür" ta BAN-isa ashi.

Sorkari tapet mapa meinyakra onoki Public Interest Litigation (PIL) ka benoktsü ta parnokisa tekümdangtsü olen ka shiogo.

BAN-i Nagaland sorkar dangi züluba shidi nung Town aser Municipal Councils ajak dang goods & services supply atema exclusive tenders mesüra permits magütsütsü tetuyuba agütsütsü ayongzüka lir.

Parnokisa ozüng alema allotments agüja aliba ajak agentsü aser ozüng tapet kübok ibala mapa inyakra ketdangsurtem merenshitsü takhangba agütsüogo.

Ochimashiba inyakyim den yaritepba kija/firms indang license sota ayutsüla mesüra agentsüla aser tarutsü nung ibala mapa meinyaksü atema yimjak nung sangdong agütsütsüla ta BAN-isa state sorkar dang ashir.

Municipal aser Town Councils-i shishilembatsü mesüra tajangzük angutsü atema masü saka ketdangsubaren aser public yariba mapa shitak inyakdakjang ta BAN-isa sorkar dang shiogo.

CS Dr. Alam-i tzüngluruwa atema senden amen

Dimapur, May 21, 2025 (TYO): Chief Secretary aser Chairman SEC, NSDMA Dr. J Alam, IAS-i Bodbarnü monsoon preparedness senden ka ayonga menogo.

Iba senden ya Deputy Commissioner tem aser District nung Heads of Departments den amen aser tzüngluruwa dak sendakba osang metetpelaogo.

District shia nung essential commodities aliba, lenmang tia, healthcare services indang osang lemsatepba den lokti nübodoka mapa inyaksü jembi.

"District kar nungbo tzünglu peria marutsü aser kar nung tali arutsü akok. Anungji Deputy Commissioner aser line department ajaki kechi rongdak nüngdak adokdir yariteptsü renema alitsüla" ta Dr. J Alam-i ashi.

Paisa Deputy Commissioner tem mapang shia preparatory meetings ayonga amentsü aser department o telok balala nem tetuyuba agütsütsü aser inyakyim latetsü metetdaksü.

Paisa Kohima aser Dimapur tsüngda lenmang junga ayutsü aser talisa old KMC dumping site anasa kümshia anentsüh aluba aser khu tali abenba truck garitemi lenmang noktanga ayuba khuretttem reprangshimtsü ashi.

Chief Secretary-i administration, Police aser line department ajak dang traffic tip atemtsü aser tanga lenmangtem anepalutsü ayongzük.

PWD Department-i anentsüh aludak mesüra lendong atalokba tesemtem nung nüngdakba machinery ayutsüla aser essential commodities peria ayutsüla ta paisa ashi.

Health & Family Welfare department-ia tzüngluruwa dak sendakba lendong aser wara atema renema alitsüla ta Dr. Alam-isa metetdaksü.

Iba senden nung Deputy Commissioner & District Disaster Management Authority (DDMA) Chairman aser District Head of Department ajak Video Conference ajanga aden.

MPLADS kübok Community Ambulance 4 agütsüogo



Dimapur, May 21, 2025 (TYO): May 21, 2025 nü Neo Motors, Dimapur nung Community Ambulance Distribution sentong ka ayonga agiogo. Iba mapa ya Member of Parliament Local Area Development Scheme (MPLADS) kübok inyaker.

Sentong nung Dimapur Deputy Commissioner Dr. Tinojongshi Chang-i alakteta jaoker ka ama shilem agia liasü.

Sentong nung Dimapur Deputy Commissioner Dr. Tinojongshi Chang-i alakteta jaoker ka ama shilem agia liasü.

Sentong nung MP S. Supongmeren Jamir-i o jembidang Naga lennirtemi state nung temelenshi bener arutsü atema telongjem, ajemalu aser tebilemtsü khuret bena inyaksü ayongzük.

MP temi Parliament nung shilem tajung agitsüsa kin Hoho tem, NGOs, aser civil society organizations-i MP tem den amaliteptsüla aser tebilemtsü lemsateptsüla ta paisa ashi.

"Nagaland nung opposition maliba sorkar nung khuret aika lir aser iba ama system ka nung democracy timtemer anungji NGO temi shisatsü agütsütsüla aser tenük yoktsüla" ta Supongmeren-isa ashi.

"Opposition maliba sorkar ajanga democracy mali kümogo. Opposition maliba sorkar ka

nungi asenoki terenlok mesüra state atema mapa tajung teimla kecha mali. NGO temi sorkar len anitsüla aser parnok ya state nung ozüng amertem ta angatetdakja mapa inyakdaksütsüla" ta paisa shisem.

Nisung ajaki Naga maitsü, sobaliba aser temetentem kümzüka ayutsüla, ta Supongmeren-i nenshia ashi.

Paisa Deputy Commissioner, hoho lennirtem, aser gari agütsürtem dang pelaba metetdaksü aser tarutsü nunga maneni NGO aser civil society maparen nung yariteptsü mepishi.

MP Supongmeren-i MPLADS ajanga nübortemi nüngdakba ambulance agütsüba atema tenüngsang agütsür, ta Dr. Tinojongshi Chang-i ashi.

2003 nung Dr. Tinojongshi-i EAC ka ama inyakdang Supongmeren den mezüng ajurutepba bilemteta jembidang Supongmeren dak ajemalu aliba aser public tenzüktsü tenangzükba yur inyakra atema tenüngsang agütsü.

Dimapur ya "mini Nagaland" ka lir anungji district nung alir ajak telongjem nung aser putepa alitsüla ta paisa metetdaksü.

MPLAD kübok agütsüba ambulances ya public yariba nung amshitsüla aser ajak külemi longiemer terenlok bener arutsü merangtsüla ta Dimapur DC-isa

ashi.

2023 nung Dimapur DC ama inyaksü arudang ENPUD den ajurutepa sensaksemdang ambulance ka alitsü temepishiba agütsü aser tanü tenla agütsüba ajanga iba nüngdak peritsüba atema pelar ta paisa ashi.

Iba sentong nung District Programme Officer (DPO) Dimapur, N. Chuba Phom menden liasü aser Phom Baptist Attoi, Diphupar Associate Women Pastor Joikap Phom-i ambulance tem meshiteta sarasadem.

Tanü sentong nung to Ao Senden, Mokokchung; Chakhroma Public Organisation, Chümoukedima; Eastern Naga Public Union Dimapur aser Western Sumi Hoho, Niuland, Chümoukedima & Dimapur teloktem nem community ambulance pezü agütsü.

MP Supongmeren ta jembiba ama inyakra lennir ka lir. MPLAD kübok agütsüba ambulance ajanga emergency medical care nung teyari tulu angutsü aser ibaji talisa meta talang pilar alidak alirtem ajangzüktsü ta telok pezü nungi tanishirtemi ashi.

November 2024 nunga MPLADS scheme kübok Kohima, Phek, Wokha, Zunheboto, Tseminyu, aser Peren district tem nem ambulance agütsüogo.

Western Sümi Hoho-i MP Supongmeren dang pelar

Dimapur, May 21, 2025 (TYO): Member of Parliament (Lok Sabha) Supongmeren Jamir-i Western Sümi nunger nem kanga dang mulungsoa Ambulance ka tenla agütsüba atema pelar ta Western Sümi Hoho (WSH)-i metetdaksüogo.

MP Supongmeren-i election nung nangzükba mapa küma inyakra aser teküpoktiba jenjang

nung alirtem yariba atema pelar. Iba mapa ajanga healthcare system nung teyari tulu angur ta WSH-i tanü sangdong ka nung ashi.

MP Supongmeren-i mapa tajung inyakra atema tenüngsang agütsür aser pa anema aliba den tarutsü nung takoktem angutsü sarasademtsür. Pai kanga dang mulungsoa teyari agütsüba

ajanga rural aser urban healthcare facilities tsüngda sendakteptsü ta WSH-isa ashi.

Western Sümi kübok Dimapur, Niuland aser Chumoukedima District nung alirtemi medical emergency mapang ambulance service amshitsü aser nüngdakba mapang amshitsü mepishir ta WSH-isa metetdaksüogo.

Lt Gen Vikas Lakhera-i Mokokchung semdang



Dimapur, Monupii/May 21 (TYO): Lt Gen Vikas Lakhera, AVSM, SM, DG Assam Rifles-i, May 20 nü Mokokchung nung Assam Rifles Battalion semdanga iba tesem nung security asadangshiogo.

Iba sülen pa Sungratsu yimtsüingi ao, kong pai arishi küm 105 tain AR veteran Havildar Mering Ao, SC (Retd) den ajurutepa liasü.

Havildar Mering Ao ya 1920 küm November 15 nü aso aser pa ya 3rd Battalion Assam Rifles nung nungtugu veteran

aser force puti otsü nung gallantry award angurtem rongnung tambusang lir. Pa arishi küm 105 tain lir. Pa World War II nung Kohima aser Burma tongbang nung raraogo. 1960 küm Nagaland nung counter-insurgency operation ka nung pai pa tasü aitba sayua telungpu ka tepset aser ana yiruja liasü. Iba tasü tait inyakyim atema pa nem iba mapang tir Dr. Rajendra Prasad-i 1960 küm April 21 nü Ashok Chakra Class III (Shaurya Chakra ta nüngja

melen) agüja liasü.

Lt Gen Vikas Lakhera-i pa nem pelaba temaitsü sayu aser pai AR tenzükba aser taküm tepeyong linük atema bendanga agüja inyakba atema tenüngsang agüja liasü.

Havildar Mering Ao inyakyim asoshi 2023 küma Gen PC Nair former DG AR-i pa semdangogo aser Assam Rifles-i pa aser par kibong den maneni tongtepratepa arudar. Havildar Mering Ao taküm aser mapa ajanga tang tashi nisung aika ajungmesor.

Kohima DDMA senden nung tzünluruwa atema renema alitsü sensak asem

Dimapur, Monupii/May 21 (TYO): Kohima Deputy Commissioner aser District Disaster Management Authority (DDMA) mendenbuba B Henok Buchem, NCS-i ayongzüka May 21 nü Kohima district indang DDMA ketdangsürtem den DC Office nung senden ka menogo.

Iba sülen Chief Secretary J Alam, IAS, aser Nagaland State Disaster Management Authority (NSDMA) nungi ketdangsürtem den video conference ka agia liasü.

Senden nung district nung tzünluruwa atema renemshiba dak sendakba nung Chief

Secretary-i onük benokbatem sensaksema liasü. Tongtibang onüktem rongnung lenmang, medical aser chiyongtsü supply aser lenla ajak nung jongdak mapang telangzüba agütsütsü asoshi inyakyimtem indang sensaksemaba densema liasü.

Tzünluruwa tenzüker asünung tebilemtsü kaji lenmang majungba ya lir. Züngsemtemi jongdak mapang amshiba lenmangtem anepalua atatsü sensak asem, talisa anentsüh alura iba ajanga timtem agütsür asünung iba onük benokogo, aser iba den Kohima kübok urban area tem nung tesem balala nung tzü

matsüngdaksütsü asoshi kilentsü nokdanga aliba jangja merektetsü nüngdakba benoka jembia liasü.

Committee-isa, khu abenba garitem nung khu tozük ka dang bendaksütsü sensak asem den lenmang ka ajanga dang sendaktepba yimtsüngtem tebilemtsü aliba indang sensaksema liasü.

Maneni senden nung Kohima Municipal Council (KMC) councilors temi pei kiyong achaayanga nübutoka merekmeju sentong ka ayongzüka agitsü telemtetba agiogo. Iba mapang department balalai main roads merektetsü.

'Women for Trees' campaign tenzükogo

Dimapur, Monupii/May 21 (TYO): Ministry of Housing and Urban Affairs (MoHUA)-i, AMRUT Mitra inyakyim kübok 'Women for Trees' campaign amenoktsüogo.

Iba campaign ya DAY-NULM den longjemer inyaker, koba tetsürtemi aniba süngtong atemba sentong ka lir.

Inyakyim ya shilem ana küma lemsar inyaksü.

Mezüngbuba shilem (May 21 nungi 23) nung tesemtem semdangtsü.

Water Treatment Plants (WTPs), tzümbang balala, ULB meyong park tem aser sorkar alitem densema süngtong atemtsüba tesemtem jangjatsü atema Self Help Group (SHG) tetsürtem 50,000 dak temai shilem agitsü

Iba sentong ayongzüka

agiba nükjidongji SHG züngsemtem nem süngtong atemba tesemtem jangja lidaksütsü asoshi lir aser iba ajanga parnoki urban greening strategies angatetsü. Item tesemtem semdangba ya orientation sessions ka ama asütsü. Urban Local Bodies (ULBs)-i item tesemtem semdangtsü achaayangtsü aser achi ajemtsü anepalutsütsü.

Tanabuba shilem (June 5 nungi August 31) nung süngtong atemtsü.

Tanabuba shilem nung SHG tetsürtemi taoba mapang jangjar aliba tesemtem nung süngtong atemtsü. World Environment Day (5th June) nü tenzüka iba sentong ya August 31 tashi benoka inyaksangshitsü.

MoHUA-i, state, UT, aser

ULB ajak dang branding, outreach, aser documentation atema IEC guidelines sülen anidaksü mepeshia metetdaksüogo. Google Drive link ka ajanga standardised communication materials tem agütsür.

Sentong nung shilem agiba SHG temi Mokokchung nung May 21 nü süngtong atemtsüba tesemtem semdangogo, Phek nung May 22 nü semdangtsü aser Dimapur, Kiphire, Kohima, Longleng, Peren, Tuensang, Wokha aser Zunheboto nung May 23 nü semdangtsü.

Iba campaign ya tzümpung wazüka ayutsü atema tongtibang jenjang ka agiba dang masü saka iba ajanga India nung tetsürtem nem tashi agütsütsü.

Dimapur DDMA senden ayonger

Dimapur, Monupii/May 21 (TYO): Dimapur district nung tzünglu kanga sashia arua tzümetsüing agi meneptsü aser mopung kanga sashia aotsü ana nung aliba mapang Dimapur Deputy Commissioner Dr. Tinojongshi Chang-i May 23 nü 1 ako nungi tenzüka District Disaster Management Authority (DDMA) senden ka ayongzükogo. Iba senden ya Deputy Commissioner indang

office conference hall nung amentsü.

Senden nung sensaksemtsü aliba onüktem rongnung, tzüngluruwa matong tsüngda renemshia atatsüba atema sensaksemtsüba aser mezüngbuba quarter nung inyakyimtem lepa reprangshitsüba densema lir.

Ken o dak sendaka alirtem ajak iba senden nung tamakok maludaktsü arua shilem agitsü atema DC-isa metetdaksüogo.

DIC Mokokchung-i ayongzüka awareness sentong ka agiogo



Dimapur, Monupii/May 21 (TYO): District Industries Centre, Mokokchung-i ayongzüka Start-Up Nagaland dak sendakba nung anogo ka atema awareness sentong ka May 21 nü Mayangnokcha GHSS, Mokokchung nung agiogo.

MHSS Vice Principal, Votiba-i lokti pela agizükba o jembiba mapang iba sentong agitsü atema school nem maongka agütsüba atema Department dang kanga pelaba lemsatop. Maneni paisa kaketshirtem dang meranga inyaksü aser classroom nung angazükba dang masü saka iba dak alia angazüktsü atema yakyaka alitsü aser merangtsü ajungshia liasü.

Sentong nung o jembiba mapang Functional Manager,

Asula Imlong-i, Start Up Policy nükjidongji innovation aser entrepreneurship ecosystem tashi tait ka tentetsü atema ajungmesotsü atema lir, ta ashi.

Laisa, kaketshirtem parnok dak tebilemba balala alibatam mapa küma inyaka aotsü atema ajungmesotsü aser parnok nükjidongtem tongtetdaksütsü atema peisasa arangtetshia aotsü atema ajungmesotsü atema iba sentong ya kaketshirtem dak rangloker inyaker, ta ashi

Project Associate, RAMP, Tamong Longkumer-i, Start Up Nagaland dak sendakba nung power point presentation ka agütsü. Iba sentong ya Financial Analyst, RAMP, Lhouvingutuo lenisüba nung agia liasü.

Audio Management Master class tenzükogo

Dimapur, Monupii/May 21 (TYO): Task Force for Music and Arts (TaFMA), Government of Nagaland-i parnok indang capacity building initiative Skilling Nagaland sentong kübok Audio Management dak sendakba nung anogo asem atema Master class ka May 21 nungi 23 tashi agütsütsü tenzükogo. Iba sentong ya Regional Centre of Excellence for Music and Performing Arts (RCempa), Jotsoma nung agidar.

Master class tenzükba sentong nung o jembiba mapang Project Director, TaFMA, Dr. Hovithal Sothu-i, iba sentong nung shilem agirtem dang takokba tashi angazüka lokti nung temelenshi adokdaksütsü ajungshia liasü. Paisa, audio management aser sound engineering ya profession ka ta shia lanur tejangrartem dang iba ya süoki ia agitsü ajungshia liasü.

Iba workshop ya May 21 nü officially tenzükogo. Workshop lapokba sentong ya Aleno Sale lenisüba nung agi aser Koinonia

Baptist Church Evangelist Kecakielie-i Tsüngrem temaotsü meshizüka sarasadema liasü.

Sentong nungsa training indang Course Coordinator, Menguzelie Marcus Geisuo-i tongmelang agi rasa shia liasü.

Iba masterclass ya Nagaland kübok tesem balala nungi sound operators aser technical züngsemtem atema mejeta ayongzüka lir. Sentong balala agiba mapang live sound aser audio systems achaayanga nung parnok shilem kanga tongtibang ta angateta iba sentong ayongzükogo.

Training mapang sound system operations dak sendakba nung hands-on training aser technical tsütsü tangazükba balala agütsütsü aser iba ajanga shilem agirtem nem practical nung tangazükba angutsü.

Iba amala sentong balala ayongzüka agiba ajanga music aser arts ecosystem nung sempet aketba local tem aser volunteer tem nem tashi agütsütsü atema TaFMA-i maneni inyakdar.



May 21, 2025 nü Maharashtra kübok Sangli nung Congress lenirtem aser party nung inyakertemi India nunger sepaitem nem tenüngsang agüja 'Tiranga Yatra' nung shilem agiba noksa nung angur.

Operation Sindoor Outreach tenzüka telok ana Japan aser UAE-i ogo

New Delhi, Monupii/May 21 (Agencies): Bodhbhar aonung Operation Sindoor outreach tenzüka telok ana Japan aser UAE nati apusoa ogo.

JD(U) lenir, Sanjay Jha-i aniba telok Japan-i ao aser Shiv Sena nungi MP, Shrikant Shinde-i aniba telok UAE-i ogo.

Parnok New Delhi nung apusotsü lia Foreign Secretary, Vikram Misri-i party tenet nungi shimtetba MP tem aser taoba MP tem nem nüngdak kar metetdakja liasü.

India-i linük aika semdanga alima dang Pakistan-i sponsor süa kiralongraba osang sangdongtsü atema telok tenet shima lir, aser telok tenet nungjagi anabo apusoa ogo.

April 22 nü kiralongrartemi Jammu & Kashmir kübok Pahalgam amakba sülen India-i Operation Sindoor kübok Pakistan aser Pakistan occupied Kashmir (PoK) nung kiralongrartem camp teku amak.

India-i maneni kiralongra anema raraba dak sendakba nung party balala nungi MP tem shimteta parnoki UN Security Council nung lenirtem densema

linük aika semdangtsü.

Party balala nungi shimtetba MP tem jagi India-i kiralongra magizüktetba aser kiralongra anema raratsü temelungtetba osang sangdongba den külemi Pakistan-i yaria kiralongrartemi arrtsü adener kiralongraba osang sangdongtsü.

Japan-i apusoa aotsü lia Delhi airport nung osangbenertem den jembidang JD(U) MP Sanjay Kumar Jha-i, "Onoki Japan, Indonesia, Malaysia aser South Korea linüktem semdangtsü. Tongtibangba onükji Pakistan linük mapatongji kiralongra lir. Onoki ibaji alima nem metetdaksütsü. Onokisa parnoki nuclear agi amokmerenba anendaksütsü. Onoki kiralongra kecha magizüktettsü. Onoki alima nem Indus Water Treaty indanga metetdaksütsü," ta metetdaksü.

Bodhbarnü Congress lenir, Jairam Ramesh-i, Operation Sindoor indang alima nem metetdaksütsü atema party balala nungi lenirtem alima linüktem nung yimibatem

semdangtsü yokba ya Ato kilonser Narendra Modi-i tanga onük paidoktsü atema inyakba maparen ka lir, ta metetdaksü.

Paisa, kiralongrartemi Pahalgam amakba onük nung o lemteptsü atema kechiba sorkari Parliament nung temeja senden ka mayongzüker, ta asüngdang.

Paisa, "Iba ya tongti onük paidoktsü inyakba asütsüa akok ta ni bilemer. Onoki chichiba kiralongra aser kiralongrartemi amakba, China aser Pakistan dak sendakba onüktem benoker. Kechiba nai Parliament nung temeja senden ka mayongzüker," ta asüngdang.

"April 22 nü tatalokba sülen nungi Congress aser tanga opposition party temi party ajak senden ayongzüksü akhangar. Senden anabo menogo saka Ato kilonser maliasü. Tesülen Opposition lenir Rahul Gandhi aser Kharge nati shidi ajanga Ato kilonser dang Pahalgam amakba dak sendakba nung o lemteptsü atema Parliament temeja senden ka ayongzükan ta mepishiogo," ta paisa metetdaksü.

Tourism sector asentenshitsü atema PM Modi leniba nung senden amen

New Delhi, Monupii/May 21 (Agencies): Kiralongrartemi Pahalgam amakdang raliwalir aika khasetba sülen India nung tourism sector asadangtsü aser asentenshir ajungkettsütsü nükjidong nung Ato kilonser, Narendra Modi-i senden ka ayongzüka menogo.

Iba senden nungji Union Tourism Minister Gajendra Singh Shekhawat, Tourism

Ministry nung deputy minister Suresh Gopi, Union Tourism Secretary V Vidyavathi aser tongti ketdangsertem aika aden.

Tongti ketdangser kati, "Tan Ato kilonseri tourism sector atema inyakba maparen asadangtsü atema senden ka ayongzüka menogo," ta metetdaksü.

Bendanger raliwalirtem puatsü aser talisa Jammu &

Kashmir nung raliwalirtem ajungshitsü atema sorkari inyaker. Iba senden nungji tang teinyakdak mapatem asadang aser tourism ajungkettsütsü atema telemtetba kar agiogo.

May 15 nü Jammu & Kashmir Chief Minister Omar Abdullah-ia Civil Secretariat nung Hoteliers Association nung ketdangsertem ayongzüka senden ka menogo.



May 21, 2025 nü Jammu yimti t e z ü l e n International Border anasa security sepaitem tongbang raratsü atema renema dang aliba noksa nung angur.

Chhattisgarh nung Maoists telungpur 27 khaset

New Delhi, May 21 (Agencies): Tesüiba ghonda 50 tsünga Chhattisgarh state nung arrtsülen aliba district tem nung sepaitemi Maoists telungpur 27 khasetogo, ta state Home Minister Vijay Sharma-i metetdaksü.

Abujhmad nung aliba arem nung Maoists Commander ka lir ta intelligence osang ajanga metetdaksüba sülen Narayanpur, Dantewada, Bijapur aser Kondagaon districts nung aliba District Reserve Guard (DRG) leniba nung sepaitemi Maoists telungpurtem mita ao.

Abujhmad nung arem tulu lir aser iba tesem ya Goa danga tuluba lir. Item tesem tulubaka Narayanpur kübok lir saka Bijapur, Dantewada, Kanker aser Gadchiroli districts-a ayimjemer.

Sepaitemi khasetba Maoists telungpurtem rongnung 'Basava

Raju' ta ajasang Nambala Keshava Rao-a densema lir. Raju ya Communist Party of India (Maoist) nung general secretary liasü.

Bodhbhanrü Union Home Minister Amit Shah-ia X ajanga, "Maoists samatsütsü atema raraba tongbang tuluka koktetogo. Tanü Narayanpur, Chhattisgarh nung telungpurtem mita aoba mapang nung asen security sepaitemi Maoists 27 khasetogo. Parnok rongnung CPI-Maoists nung General Secretary aser Naxal movement nung tongtired, Basava Rao ta ajasang Nambala Keshav Rao densema liasü," ta metetdaksü.

Shah-isa, tang mezüng security sepaitemi Communist Party of India (Maoist) nung general secretary rank nung lenir ka khaseter, ta metetdaksü.



New Delhi, May 21, 2025: Taoba mapang Ato kilonser, Rajiv Gandhi asüba anogomong nung Lok Sabha nung Opposition lenir, Rahul Gandhi-i tebu nem akhüm agütsüdang tangokba noksa nung angur.

Nisung aika tepsetsang, Devender Sharma police-i puogo

New Delhi, May 21 (Agencies): Nisung aika tepsetsang arrshi küm 67, Devendar Sharma Rajasthan kübok Dausa nung aliba ashram ka nung lia puogo; pa yangji putir ka ama telidak liasü.

Amongnü nikongdang Delhi Police crime branch nungi ketdangsertemi pa apu. Pa anema nisung tepsetba, nisung puer aoba aser auyaba dak sendakba ken o 27 benoka liasü.

2023 kümAugust ita nung pa bail nung chiocka sülen nungji pa mimshia liasü.

Pai ozüng alema kidney transplant asüba nunga shilem agi aser taxi/truck driver aika tepsetba sülen tzüurang aliba ayong nung tasümantemji indoka liasü aser gariji yoka achi.

Deputy Commissioner of Police, Aditya Gautam-i, "Dr Devendra Sharma-i nisung aika tepsetba nung shilem agia lir, ibayongji pa dang 'Doctor Death' ta aja. Tang tashi nung ken o 26-27 nung pa densema lir aser ken o 6-7 nungbo pa aitsüogo. Pa taküm piyong tepuokdak ayutsü atema obendang agütsü aser ken o ka nungbo pa nem tasüba temerenshi obendang agütsü," ta metetdaksü.

Police-isa, 1998 küm nungi tenzüka Sharma-i ozüng alema tezüngjang transplant sütsüba

nung shilem agia liasü, ta metetdaksü.

Sharma-i tesüiba küm 30 jungnüa ozüng alema aibelen mapa jenti inyakogo. 1994 küm pai gas dealership bushidang sen lah 11 takoksa anguba sülen pa Aligarh-i meyipa arua taila gas agency ka tenzüka liasü.

1998 nungi tenzüka 2004 küm tashi nung Sharma-i tanga doctor tem den senteper Delhi, Haryana aser Rajasthan state tem nung ozüng alema kidney 125 transplant sütsü aser transplant sütsüba shia pai sen lakh 5 nungi 7 tashi aazüka liasü.

2002 nungi 2004 küm tashi Sharma den pai aniba teloki taxi drivers aser truck drivers aika tepset aser gartemji ayok. Tasümantemji Uttar Pradesh kübok Kasganj nung tzüurang jenti aliba Hazara Canal nungsa merepokja liasü.

Pai police dang nisung 50 tepsetba nung pai shilem agia aliba nangzükogo.

2004 küm pa apuba sülen Delhi, Rajasthan aser Haryana nung nisung tepsetba ken o tenet nung pa aitsü aser ken o ka nungbo pa nem tasüba temerenshi obendang agüja liasü.

Tamalen Sharma ya Rajasthan kübok Bandikui nung Janta Clinic nung inyaka liasü.



TIR YIMYIM YIMOBILEM (EDITORIAL)

DIMAPUR THURSDAY, MAY (MONUPII) 22, 2025

Sen tama agütsüba light

Nagaland nung 'factions' dak alaka nisungtem asoshi nüngdak agibo kecha agia meperir. Nagaland timtembaji iba jagi timatemer. Aji oda, nisungtem taküm alitsüba nüngdaktem tzüa joko tesem aika nung alia dang ajemer aser moponga temenenba kümdagi aser electric light tashi agi meperir asünungji, tanga mapa tulu inyaktsüabajibo yutsür, ghonda ka lokti senden sentong asoshia generator renema meyui Power department dang nungi alia atsükba electric light dakbo temulung alemtsüla masü kümogo. Iba ama tia ka nung, Nagaland nung Power Department-i Tzüla (Dikhu) ayong ama nung Hydro Power Project ka danga tenzükner saka ali kiburtemi pei li tzü agi atsübangdaksütsüabaji memulunger, anungji metenzükter. Nagaland nung asenok electric power agi meperiba tebilemtsü mekoktetba timtem aser kuliji aji ka asütsü. Aji oda, asenok kanga nüngdakba oset ka asen li nungbo amenoker meyangludaksüba purtemji asenok lir. Ibayongji, asenok tangar dang nungi light peria alia atsüktsüba dak alaka tang tangbo asenoksasa asenok metalokdak maka kümogo. Anungji, Power department asoshi kanga nendaka inyaktsüba mapa tongtibang kaji, tang tangar dang nungi light alia atsükba ya kanga meyaka (economically) atsüktsüsa sentong shitak alitsüla aser light yabo angati tsüdaktsür masüji, light atsükba bill ya shitak bendena shitak sarutsüla. Atangji, nisung karibo light bill shitak magütsüi alitsüa akok saka tanü asüngbo, akhi ama masü, nisung aikati angateta arua light bill shitak-shitak agüja aruba angur. Ibaji kodang bilemdangdir, tangar dang nungi light tashi aliba senbo menoktettsüsa Power department-i inyaktettsü tim. Iba nükjidong nungji, light bill mapang shitak nung sarutsü asoshi Power department-i Nagaland nunga tang amai ita nung light atsükba yari meter züngdang sen meshiba inyakyim melenshia, light matsükdangyongi sen tama 'Prepaid' agütsüsa aser light atsükba yari aseni agüja aliba sen nungi katia anidaktsü. Atangji, iba jagiang ajaki tekümdangba aser temeyakba atsüktsü, kechiyong idangjibo asenoki anogo shia light sen kwi jenjang atsükar meteta anidaktsü aser tagimatsü anasa jet ta ano 'recharge' sen enoktsütsü, kechiyong aji meinoktsüra light marutsü. Iba inyakyimji Dimapur nung tesem kar nung tenzüka inyakdagi aser tang nungi Dimapur district nungbo tesem ajaklen 'Prepaid metering syatem' tenzüktsü government-i ozüngsa agüja lir. Ajisüaka, Dimapur nung Goanbora telok telongjem aser Urban Council Chairmen Federation teloktemi iba 'Prepaid Metering System' ya metenzükdang tamasa light yindong song agi chimar talaor alibatem den yinzü tejentem ajak melenmatsüla aser iba inyakyim tasenba ya government office aser industry lapoka alidak aser business inyakba tesemtem nung tama ser tenzüktsüla aser aji ser külenang nübortem ki shia nung enoka aotsüla ta metetdakja lir. Atangji, parnoki ashibaji shitak lir, kechiyong Nagaland nungbo light bill shitak magütsürtem ya nübortem dang nungibo government office aser government kidang atsükba light bill teimba adoka alitsü. Ano, Nagaland nung industry tilateri kar lapoka alidaka, ashiko, meter box mali ser tangatettep nung inyakdakja alitsüa akok. Ano, shishilembadak ki tulu kar nunga meter box mali ser lia alitsüa akok. Ano, kiyong kar nungbo department-i memetet peisasa light atsüzüka tsüka alitsüa akok. Ano, kibong kar nungbo meter box raksar bill ajema agüja alitsüa akok. Item meshitakbatemji kodang bendendir, ashiko, light bill agütsürtem dang nungibo magütsürtemjiang teimba asütsüa akok. Tajung kaji, Nagaland Power department-i inyaknuba amaji Nagaland nung "Prepaid electric system" tenzüktsüabaji ajaki mulunga lir saka iba mapa inyakyim tajungji government office, government ki aser industry aliba tesemtem nung tama tenzükdaksüner aser light shitak junga arutsü atema electric yindong aser yinzü tejentem tama melendaksüner aser transformer tila aser tejentema tajungba aser tuluba küma yanglushir külenang iba inyakyim tasenji tenzükdaksüner. Itemjibo nübortemi makangdangyongi government-i inyaktsür alitsüla, kechiyong light yindong aser yinzü nungjibo lendonga tulu keta lira ser 'prepaid' asüyonga transformer meshitakra light marutsü.

OLEMSABANG

Asen jabaso-jalaji asen noksa lir

~ L.Kika Pongener.

Asen jabaso jalaji asen noksa lir, kechiaser tsürabur kechi aji chirnuri sayutsü. Tsüraburi mapa tajung inyaka ochishia lira, iba senmang tajungji chirnur aser semchisemnur tashi amangtepyonga aotsü. Sungdong jungra iba sungjangji ajungtsü, saka sungdong mejungra iba sungjang-jia majungtsü; kechiaser sungdongji kechi aji pei sungjang agi meteter (Mathi-12:33). Tetsü-tebuo-i tasen chira chirnur aser semchisemnur tashi tepo mejemtsü (Ezekiel-18:2). "Ozü tsüraburtemi temenen mena, aser parnok joko mali, aser onoki parnok tai temenen khu abener" (Aiatai-5:7). Sungdong ajak nungbo sungjang tajung matanger, sungdong kar nungbo sungjang tarak keter tachitsü mejungi tangteter. Asenoki iba sungdong telung nungji lep-poka reprangdangra, ashiko, iba sungdongji tila asüdang nok agi leptur tarak keter indaktsüba asütsü akok, mesura ali telung nung tera ayangdak mesen (Worm) agi chir alitsü akok, mesura sungjang atangtsü teben apongba mapang mesen ayiba asütsü akok. Aji oda, ibala timtem jagi sungjangji tarak keter tachitsü mejungi tangteter. Tsüraburi aibelenba temenen agi chirnurtem dena khangshir.

Sungdong tarak aketba amaji asen nisunger libaliro nunga tsürabur libaliro mejungra jala-jabaso tajung mesotettsü. Tsürabur ashi-auera sura chirnur-a ashi-auera asütsü, tsürabur ashi-külak nisung sura chirnur-a ashi-külak asütsü. Tsürabur yimden, arogo aser lokti nung ketdangsuba nung ochimashi sura chirnur/semchi-semnur kasaji sotettsü. Tsürabur yimden, arogo aser lokti raksatsür sura, chirnur-a kasaji asütsü. Yamaji tsüraburi taküm junga melitetra, tia makar karbo chirnur sopet-tangpet, mata-mabensa aser salok-sara sotettsü. Yisu-i ashi, "Kechiaser sungdong tajung nung sungjang tamajung matanger, mesura ano sungdong tamajung nung sungjang tajung matanger. Kechiaser sungdong shiaji pei sungjang agi meteter. Kechiaser ayidong nungi nisungi mongu maonger, mesura korishidong nungi parnoki tsükmenatsüjang maonger" (Luk-6:43-45). Tasendong nung tasenjang atangtsü aser takodong nung takojang atangtsü". Yisu-i ashiba ama.... Sungdongji kechi'ar iba sungjang jagi sayutsü.

Anungji tangari metetet-aka, memetet-aka, nguaka, monguaka, asenoki indang-indanga ochishia alitsüla. Asenok adenba aser tenzükba lokti ajak nung tangari asen dak tajung chitettsüsa aser tatishitsü tajung agitsüsa asenok takümji alitsüla. Asen nem nungloktsüba mapa ajak nung tangari mashishitsüsa aser temulong lemtettsüsa inyaktsüla. Yamaji asenoki asen azü (Blood) memenen, asüngteta yutetra, asen dak nungi chirnur tajung alima nem tajangzük agütsüba watsü-wabong tajung sotettsü. Asen jabaso-jala ya asenoki asenok nem odang moatsüba amai züba-züba bilemer, saka Tsüngremi asen nem senmangtsü asoshi balaka nu menden nung alidangyongi renemer agütsüba senpet lir. Tsüngrem o-i ashir, "Angang chirnurji Kibuba nungi anguba senmang lir; aser nu menden nungi tejangji pa senpet lir" (T.Ken-127:3). Aji oda, tetsürtem-ia pei "Nu Menden" asüngteta merukteta meyura, chirnur tajung mesotettsü, kechiaser chirnur ya nu menden nungi Tsüngremi asenok asoshi senpet balaka renemtsüba lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jerusalem nung First Council of Nicaea kum 1700 ajungba among



First Council of Nicaea sülen kum 1700 ajungba nungtem nung May 20, 2025 nü Yirusalem nung Most Holy Name of Jesus Tenla kidang Cardinal, Pierbattista Pizzaballa leniba nung tekülem sentong agidang tangokba noksa nung angur.

May 21, 2025: First Council of Nicaea sülen kum 1,700 ajungba nungtem nung Mongolbarnü (May 20) London aser Yirusalem nung aliba Arogotemi senteper sentong ka ayongzüka agi.

Akhidang mezüing Arogotemi tamangertem ajak tangatetba ka asütsü nükjidong nung Nicaea nung mezüingbuba council ayongzüka liasü.

Arians nungertemi Yisu Khrista ya Tsüngrem ama tetenzük nungi maliasü ta jembiba mangatettep bentettsü atema iba council ayongzüka liasü.

Ajioda Council jagi, Yisu-a Tsüngrem ama lir ta lemteta Tebu, Techir aser Tanela Temeshi (Trinity) bangjema liasü. 325AD nung ayongzüka senden nungji Council-i Nicene Creed tentet, aser ibaji Roman Catholic, Eastern Orthodox, Anglican aser Protestant Arogotem densema tongti

denomination aikati agizüka liasü.

Mezüingbuba council sülen kum 1,700 ajungba nungtem nung London nung aliba Temple Church nung Yirusalem nung aliba Most Holy Name of Jesus Tenla kidang agiba sentongji live broadcast süa liasü.

Iba sentong ajanga Khristan lenirtem aser Khristantem longjema sarasadem.

Yirusalem nung Beatitude Cardinal Pierbattista Pizzaballa leniba nung iba sentongji agi aser London nung Episcopal Diocese of Jerusalem nungi Archbishop Hosam Naoum aser Cardinal Vincent Nichols na leniba nung iba sentongji agi.

Iba sentong tembangba sülen Friends of the Holy Land-i Temple Church anasa aliba hall ka nung jurila sentong ka ayongzüka tang Yirusalem tensa lemstepa liasü.

First Council of Nicaea dak

sendakba nung Friends of the Holy Land nungi Brendan Metcalfe-i, "Khristan Arogo mezüing longjemer tamang dak sendakba sangdong agütsübaji ibaji liasü. Nicene Creed ji ajanga asenok longjemdaksür," ta metetdaksü.

"Iba ama sentong ka nung Yirusalem nungi Arogoi shilem agitetba atema pelar. Iba mapang ya longjemtsü mapang ka aser tang temeshi lima nung tatalokbatem atema jashitsü mapang ka. Yisu jajaba tesem nung yimjung aser taitoktep alitsü atema nüburtemi longjemer inyaktsüla," ta paisa metetdaksü.

Nicene Creed ji ajanga Tsüngrem ka, Tebu, ajak Takoksang aser anüing-ali yanglusang ka dang ta agizüker. Nicene Creed ajanga, Yisu Khristaji Tsüngrem ajaso chir, Tebu den ka dang; Tsüngrem ka dak dang ta agizüka sangdonger.

Manipur nungi Arogo lenirtemi UK Special Envoy nem temepishiba agütsü

May 21, 2025: Manipur nungi Arogo lenirtemi UK Special envoy for freedom of religion & belief, David Smith MP dang rara ajanga state nung Khristantem kanga timtemba aser tesem balala nung jenshia aliba tebilemtsü bentettsü atema tiyongtsüü aita inyakdaksüner, ta mepishigo.

2023 kum May ita nung Manipur nung rara tulu adoka Hindu yimsü alia amangertemi Tenla ki 360 den Khristantem ki 7,000 shi rongdoksüba sülen kum ana shi lir tang Arogo lenirtemi International teyari meshir.

Manipur rara nung Khristan 200 dak tali tepset aser Kuki-Zo tribal telok nungi tamangertem aika tesem balala nung jenshia lir, aser pei yimdaki meypa aotsü tsübur.

Roxeth, Harrow nung aliba Christ Church nung Anglican Vicar aser Manipur nunger Rev. Kailean Khongsai-i iba rara ajanga Khristantemi timtem ajangshiba kuli balala David

Smith aser Foreign Office ketdangsertem nem agütsüogo.

Khongsai-i, "Tang Manipur ya Delhi nungi Tir yimsüsüba kübok liaka tensa süngjemtsüsa aser taneptsü angutsüsa temaitsü kecha mangur. Anogo shia ozü tsüraburtem, kinüingertem aser Arogo züingsemtemi timtem-tejashi lemsateper. Aika teimla samaogo," ta metetdaksü.

Paisa, "Kuki nungertemi nüngdakba services balala mangur. Hospitals, universities aser nüngdakba services ajak Imphal valley nung lir. Sorkari item timtem angur saka item timtem bentettsütsü atema kecha meinyaker. Asürtem teimba dang akümer aser onoki ayimdenba ola mangashir," ta metetdaksü.

Iba senden nungji Rev. Khongsai-i Manipur nung Arogo lenirtem rongdak temepishiba balala metetdakja, "Onoki alima nem onok reprangdaksüner, onok ola angadaksüner aser onok taküm alitsü atema

yaridaktsüner," ta metetdaksü.

"Nisung meyrjang aika timtem tia nung lir, tesem balala nung jenshia lir aser taküm akhümket samaogo. Tanurtem shisaliok mengui camps nung jenoka lir aser kibongtem aika ket nung mozü mesüra teyari balala mali," ta pai metetdaksü.

Ajioda Foreign Office nungi ketdangsertemi Manipur nung Arogo lenirtem dang, Manipur nung tensa tajungba akümtsü atema UK-i inyaktsü, ajisüaka mezüingbuba nung item ajakji tangatettep nung inyaktsüla, kechiyong state nung bendanger observers nokdang, ta ashi.

Rev. Khongsai-isa India temüing kübok Kuki nunger Khristantem atema temeja administration ka alitsü nüngdak, ta metetdaksü.

Paisa UK sorkar dang Manipur nung tim mesüi inyakba mapatem anema ola adoktsü aser state nung timtemertem yaritsü atema India sorkar rongshitsüla, ta mepishi.

ANOGO ABEN TSÜNGREM DEN

Meshitettsü aser yok

Ochi nung parnok meshitetjang: Ne O ochi lir. Nai kechi koda alimai ni yok, yamaji Nia parnok alimai yoker. Yohan 17:17-18.

Tsüngremi teti na meyokdang tama meshitettsür. Tebui nütsüing tera ana shimtet aser temeshi ochi, Pa jabaso ajanga meshitettsü. Parnok Yisu den sendaktepa ali nung ochi agi (Yn. 14:6) nütsüingtemi ochi ajanga aser osangtajung sayutsüingitsü asoshi renemtsü. Yisui parnok tejangraba jazük (challenge) (Luke 9:46-48), parnok tamang ilaba indang ashi (Matt. 17:19-20), Satan arutsü (Matt. 16:23), aser parnok asükümba aitsü (Matt. 26:33-35). Kodang Yisui parnok renemtsüba atema alimaji aki ama malitsü saka melenshidaktsütsü ain agütsür Pai parnok alimai yok. Temeneni Tsüngrem tsüngdang na tamakitsü kümdaktsür ta Satani puatsü akok. Tiyazü tulu nungi ibaji tiyazü aruba asütsü. Nai temenen menali Tashioktsübai "Nai tamakok nguogo. Na tang joko Tsüngrem tsüngdang takidak maka" ta ashitsü. Iba yagi Khristan ka dangi tamakokji tali shisanga aser tali teyimla makaba kümdaktsütsü. Aji saka, Tsüngrem tanela ka nüji kümdaktsüba kecha dena medemdangtsü makok. Kodang Tsüngremer nüburi Tsüngremer ochibaji Tsüngrem mulungba nung ayutsü mulungtetdir, idangji Tsüngrem ainji mezüing nütsüingtem nem agütsüba ama parnok ajanga kasa yoktsü.

Ochibai na nüji kümdaktsütsü. Ochiji "Asenoki asen temenen nangzükra, asenok dang asen temenen adoktsü aser memeshiba ajak nungi asenok merükdaktsütsü, Pa temulung lemtetba aser ochi lir" (1 Yn. 1:9), aser asenok Tsüngrem asoshi alitsü agizüker.

England nung tekülem sentong nung adenertem teimba akümer

May 21, 2025: Tesüiba kum pezü tsüingda kum shia Church of England nung tekülem sentong nung adenertem teimba-teimba dang kümdar, ta Statistics for Mission report ajanga metetdaksü.

2024 kum tekülem sentong nung teti adentertem million 1.2 kümogo, aser ibaji 2023 kum den medemdangra shilem 1.2 agi teimba akümba lir.

Amongnü tekülem sentong nung adenertem-a 582,000 kümogo aser ibaji shilem 1.5 agi teimba akümba lir. Coronavirus wara sülen kum shia tekülem sentong nung adenertem teimba-teimba akümer. Ano hopta shia tekülem sentong nung adenertem 701,000 kümogo.

Archbishop of York, Rev. Stephen Cottrell-i, "Church of England ya Yisu Khrista osangtajung lemsateptsü aser England tesem ajaklen kiyongertem meima tenzüktsü atema lir. Yisu Khrista dak amangertem teimba-teimba dang akümba aser taküm aika melenshiba ngua pelar," ta metetdaksü.

Amongnü tekülem sentong nung adentsü atema arur arrshi kum 16 ser temapurtem shilem 1.8 agi teimba kümogo. Ibaji Coronavirus wara jakdang den medemdangra ishiba lir,

ajisüaka tesüiba kum pezü tsüingda tekülem sentong nung adenertem kum shia renlokdar. Church of England indang AChurchNearYou.com ajanga aikati anasa aliba local Arogotem bushir. Iba online website amshirtema teimba kümdar.

Vision & Strategy Director, Debbie Clinton-i, "Tzüyimkümlen aliba jilatem nungi tenzüka yimtitem tashi nung aliba Arogotem nung nütsüing kanga renloker. Linük tesem ajaklen local Arogotem nung züingsemtemi pei aliba tesem nung nüburtem tenzüker," ta metetdaksü.

South London nung aliba St John's Upper Norwood nunga outreach sentong balala ajanga tekülem sentong nung adentsü arurtem teimba dang akümer. 'Messy Church' ama sentong balala aser Friday Toddler group nung adener aika kümogo.

John Pritchard-i, "Ozü Arogo nung züingsemtem ajema küma liasü, ajisüaka tangbo nütsüing teimba dang kümdar. Nisungtemi tamangertem rongnung denner aser Khrista osangtajung ajanga parnok nüngdak peritsür," ta metetdaksü.

Statistics for Mission report ya taküm kum tatembanglen tejangja metetdaksütsü.

AO OSHI ANGAZÜKDAK:**TANÜ ANGAZÜKTSÜBA OJANG****Tenangtet**

(n) tesongtet mungsong, tesem temejong (elevated area of a field)

* Ozü lu nung tenangtet tesem ka nung alu jen asü.

Tenaok

(adj) nepoka aiba (hollow)

* Tenaok tesem nung talitsü ki meyanglutsüla.



Tir Yimyim

OLONG PAITEP # 7158

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7157 TELANGZÜBA**TIPIEN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket,
14. Mangu, 15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

NAI-A YA METETTER MA

US nung arishi küm 74 tain Paul Budline-i Guinness World Record ka yangluogo.

Budline-i required minimum 15 seconds tashi handstand sütetba atema "world's oldest man to hold a handstand" otsü yanglu.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Kokrajhar nung Adani thermal plant anema lungkak aiter

Guwahati, May 21, 2025

(Agencies): Assam sorkari Adani Group nem ali bigha 3,600 agütsütsü lemtetba anema lungkak ait tenzükogo.

Kokrajhar district kübok Bashbari nung thermal power plant ka yanglutsü atema Assam sorkari ali agütsütsü.

Iba lemtet anema May 18, 2025 nü "Pramod Boro murdabad," "BJP government murdabad," "Adani will not be given land," aser "I will give blood, but I will not give land" yimyimtem ayima lungkak aitogo.

Bodoland Tribal Protection Forum (BTPF) executive president Daorao Decreb Narzary-i anir lungkak aitba sentong agia liasü.

Iba tesem nung alirtem

longjemer mapatong anema noktaker aser power plant atema ali magütsütsü ta Narzary-i ashi.

"Onoki SDO (Civil) Office kima nung lungkak aitba sentongka agitsü. Sorkari Adani group nem thermal project atema ali agütsütsü lemtetba anema onoki noktaksü" ta pai ashi.

Sixth Schedule area kübok ali nung non-tribal entities-i industries amenokba ya ozüng agi melar asü? ta Narzary-isa asüngdang.

ABSU president Dwipen Boro-i iba mapatong pusema nungitba atema aitsür aser pa ya tajangzük bushir ka lir ta paisa metetdaksü.

"Boro-i pa nija ajangzüksü atema mapatong pusema

nungiter. Pai nübortem asoshi mebilemtsür. Dwipen Boro-i pa dang ajangzükür. Dwipen Boro ya nüngdak maliba lennir ka lir" ta Narzary-isa ashi.

Sixth Schedule areas nung bendanger nem ali ayoktsü memelar ta State Cabinet Minister UG Brahma-i memetetba atema Narzary-isa aitsü.

Assam sorkar aser Bodoland Territorial Region (BTR) administration ajanga parnoki akhangba ama meinyakra okadaki aotsü ta lungkak aitertemisa metetdaksüogo.

Sorkari industry aser mapa adokdaksütsü ta nangzükba ya aiben ashikülak mapa dang asür ta parnokisa ashi.

Kuki Inpi Tegnoupal spokesperson Mate apuba aitsür

Imphal, May 21, 2025

(Agencies): Manipur nung Kuki-Zo civil society telok aikati Kuki Inpi Tegnoupal spokesperson Thangminlen Mate apuba aitsüogo.

January 17, 2024 nü Moreh nung Indian Reserve Battalion (IRB) post ka amakba dak sendakba nung National Investigation Agency (NIA)-i May 18, 2025 nü Mate apu.

Kuki Inpi Manipur (KIM)-i anir Kuki Women Organisation for Human Rights (KWOHR),

Kuki Chiefs' Association, Kuki Students' Organization (KSO), aser Moreh nung amenoka aliba civil groups aikati Mate apuba aitsür.

"Iba ya constitutional rights alema lir aser Kuki-Zo nunger dak tenük yoka mapa inyakba lir. Mate-i ozüng alema inyaksangshiba telok kecha den-a sendaktepa mali. Pa ya yimjung aser nübor temeten atema inyaka arur ka lir" ta Information & Publicity, KIM Secretary Janghaolun Haokip-i ashi.

"Kuki-Zo nunger ola nembangtsütsü atema pa apuba ama ajiteter" ta pai ashi.

"Imphal valley nung prangpong 6,000 tema auyaba aser police stations amakba dena ozüng alema inyaksangshia aruaka legal action kecha mali" ta KWOHR General Secretary Kimneihoi Lungdim-i ashi.

Kuki Chiefs' Association (Tegnoupal), Moreh Hill Tribal Council, aser Kuki Students' Organization dena telok aikati Mate apuba aitsüogo.

NDFB züngsem 35 tashi Kokrajhar jail-i belenogo

Guwahati, May 21, 2025

(Agencies): National Democratic Front of Boroland (NDFB) tanishir M. Batha dena parnok 35 tashi May 20, 2025 anüngdang Guwahati Central Jail nungi Kokrajhar District Jail-i belenogo.

National Investigation Agency (NIA)-i iba ken o Sessions Court ket nung agütsüba sülen tepuokdak ayurtem belen.

Kokrajhar atongba sülen parnok ajak District and Sessions Judge Court-i anir ao. Idakji

parnok Kokrajhar District Jail nung ayutsü temelaba agütsü.

Special NIA case 4 tashi Kokrajhar District Sessions Court nem agütsüogo aser tang nungi yangi angadangtsü ta Public Prosecutor Kankan Kalita-i ashi.

GOVERNMENT OF NAGALAND
DIRECTORATE OF PRISONS
NAGALAND : KOHIMA

NO.PRI/HQ/ESTT-559/22

Dated Kohima, the 22nd May 2025.

ADVERTISEMENT

Sl. No.	Particular of Post.	Total No. of Vacancies Advertised.	Pay Matrix Level.
1.	Male Warder.	30 (thirty).	Level – 3.
2.	Female Warder.	04 (four).	Level – 3.
3.	Driver Grade-II (Male only).	02 (two).	Level – 3.
TOTAL		36 (thirty-six).	

Applications are hereby invited from eligible Applicants from Indigenous inhabitants of Nagaland for filling up the post of Male Warder / Female Warder / Driver Grade-II under Prisons Department.

1. The recruitment for Male Warder / Female Warder / Driver Grade-II shall be held through Departmental Recruitment Board simultaneously as per the terms below.

(i) Applicants applying for the advertised posts of Male Warder / Female Warder / Driver Grade-II must be Class-VIII Passed from NBSE or Equivalent Qualification from other Board of School Education in India.

(ii) For the post of Male Warder / Female Warder, age of the applicant as on the date of issue of the advertisement, shall not be less than 18 (eighteen) years and not more than 38 (thirty-eight) years as per the existing Government Office Memorandum Dated the 26th February 2024.

(iii) For the post of Driver Grade-II, age of the applicant as on the date of issue of the advertisement, shall not be less than 21 (twenty-one) years and not more than 37 (thirty-seven) years as per the existing Government Office Memorandum Dated the 15th October 2024.

Serving Government employees applying for the advertised post should submit 'No Objection Certificate' issued by the concerned Head of Department along with Filled-in Application Form.

(iv) Reservation of seats for backward tribe will be followed as per the existing Government Notifications Dated the 14th April 2011 and the 15th June 2012.

(v) Application Forms attached with Particulars of Tests / Criterias can be downloaded from the Department's website <https://prisons.nagaland.gov.in> with effect from the 23rd May 2025. The Filled-in Application Form attached with the complete self attested photocopies of the documents can be submitted on payment of Rs. 300/- (Rupees Three hundred) only as registration fees at the Directorate of Prisons, Nagaland, Kohima on or before the 9th June 2025.

The Department shall not be responsible for the application submitted to any office or establishment other than the one mentioned above.

If any document is found to be forged / fake, the candidate will be summarily disqualified from the present and any future Recruitments in the Prisons Department.

(vi) The Applicants can check the rejected list with reasons on the Notice Board at the Directorate of Prisons, Nagaland, Kohima and the Department's website.

(vii) No TA / DA or any other remuneration shall be admissible to the applicants appearing in the Recruitment Rally / Tests at the designated venue(s).

(viii)The venue(s) and date for the Recruitment Rally and Tests will be notified at a later stage in the Department's website.

(ix) All selected Applicants shall be liable to serve anywhere in the State.

Sd/-
(RENCHAMO P. KIKON) IPS
Director General of Prisons
Nagaland, Kohima.

GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA

ADVERTISEMENT

Kohima Dated the th May 2025

No. ED/EST/GR-IV/SDEO-MLR/2022 : In pursuance of Government directive vide NO.DSE/APPT/MLR/3-23/2025/1107 dated 25-04-2025 and NO.DSE/APPT/MLR/3-24/2025/1109 dated 25-04-2025 , applications are hereby invited from indigenous inhabitants of Meluri District for 2(two) posts of MTS in Pay Matrix Level-1 at Government High School, Kangjang under SDEO Meluri, Department of School Education.

Terms & Conditions:

1. Educational Qualification:

Highest class read should be indicated along with all supporting documents

2. Documents required :

a. ST Certificate/Indigenous Certificate/Backward Tribe Certificate

b. Birth Certificate

c. Aadhaar

d. NOC from HOD for Government employees(in original)

e. 2 Nos. of recent passport photos.

3. Age limit :

As on day of publication of this advertisement

Minimum - 18 Maximum - 32

Note: Relaxation of upper age for ST candidates and Government employees shall be as per Government Office Memorandum

4. The application should be addressed to the Principal Director, Directorate of School Education, Kohima-797001

5. Last date of receipt of applications shall be 30-05-2025

6. Applications with incomplete documents shall be summarily rejected

7. Admit Cards shall be issued on 12-06-2025

8. Interview shall be conducted on 16-06-2025 at 12:00 P.M

(SHASHANK PRATAP SINGH) IAS
PRINCIPAL DIRECTOR

Russia tir Putin-i Kursk tesem semdang

Moscow, Monupii/May 21

(Agencies):

Russia nunger sepaitemi taoba ita Kursk tesem nungi Ukraine nunger sepaitem mintokba sülen tir Vladimir Putin-i tang mezüngbuba arrtsü nung aliba iba tesem semdangogo, ta Kremlin-i ashi.

Ukraine nunger sepaitemi 2024 küm August ita Kursk tesem maka ao, koba küm asem raraba mapang parnoki kanga tasü ita jenjang agia takok anguba ka liasü. Iba ya World War II sülen tanga linük kati Russia litsü atsüngba mezüngbuba liasü.

2023 tembangba sülen raraba tesem balala nung Russia-i timba takok ngua aruogo, saka Kursk nungbo Ukraine-i takok tajung ngua liasü.

Kursk atsünga aoba mapang Ukraine nunger sepaitemi square kilometres 1,400 (540 square miles) shi atsünga ao.

Russia-i April tatemlen ashiba agi, parnoki iba tesem nungi Ukraine nunger sepaitem mintokogo.

Mongolbarnü mapa atema iba tesem semdangba mapang tir Putin-i, Kursk nung volunteer lokti tentettem den ajurutepba den nuclear power plant ka semdanga liasü, ta Kremlin-i Bodhbarnü metetdaksü.

Russia indang state television-i, Putin-i iba tesem nung aliba volunteers aser local ketdangsürtem den ajurutepba sayuogo, kong acting governor Alexander Khinshtein densema liasü.

Putin mina Kremlin first deputy chief of staff Sergei Kiriyenko oa liasü.

Kasa mapang nung Ukraine indang national guard-i Bodhbarnü ashiba agi, Mongolbarnü missile ka amshia amakba sülen Ukraine nung servicemen trok asü aser tangar 10 yiruja liasü.

"Iba tatalokba dak sendakba nung bushisüngdang ka tenzükogo. Iba military unit indang commander mapa nungi anentsüogo aser temzüng ozüng benoka inyaksangshiba lokti tentet nem tenüngdakba osangtem agütsüogo," ta Ukraine indang national guard-i ashi.

Ukraine kübok arrtsü nung aliba Sumy tesem ya ita ishika tsüngda aiben maka arudar.

Russia defence ministry-i Mongolbar aonung ashiba agi, parnoki Ukraine kübok tesem ka nung ballistic missile ka khaloktsüogo.

(Maneni tapak 8 nung...)

GOVERNEMENT OF NAGALAND
DIRECTORATE OF TECHNICAL EDUCATION
NAGALAND: KOHIMA

NO. DTE/ ESTT-2/02/2025-26/ 6551

Dt. Kohima, the 20th May 2025

NOTIFICATION

This is to notify the **Central University Entrance Test (CUET(UG)-2025)** appeared candidates intending to avail Nagaland State Reserved **Seats in Para-Medical/ Agri & Allied Degree courses**, that the registration forms will be available at **the Directorate of Technical Education, Kohima (Below Nagaland Civil Secretariat Complex) on payment of Rs. 500/- (Rupees five hundred) only w.e.f. 27th May 2025** during office working hours. The form may also be downloaded from the **website:- <https://dte.nagaland.gov.in>** in which case the fee should be submitted in cash along with the form printed in white paper (A4 size) by hand.

Last date for issue and submission of filled form along with CUET Score card to the office of the undersigned 27th June 2025.

(Er. VIPULHOU LHOUNGU)
Director

ASEAN-i Myanmar atema senden ana ayongzüka amentsü

Jakarta, Monupii/May 21

(Agencies):

Southeast Asian telok ASEAN-i taruba hopta summit mamen tsüngda military yimsüsüba kübok civil war adoker aliba Myanmar atema mejeta senden ana amentsü, ta iba bloc indang secretary-general-i Bodhbarnü ashi. Linük nung yimjung bener arutsü nükjidong nung iba jenjang agir.

Züngsem 10 agi kümtetba Association of Southeast Asian Nations yagi telungpur aser military sorka na tsüngda rara anentsü aiben ayongzüka arudar, koba ajanga nisung million 3.5 shi pei talidak ki toktsür jenshia aotsüsa kümogo.

2021 küm Aung San Suu Kyi-i aniba civilian sorkar atsüngtokba sülen Myanmar nung mepetmesü tulu adoka arudar.

Kasa kümASEAN-i yimjung atema onük pongu benok, ajisüaka takok ngua benoka inyaksangshi mesüteti arudar aser iba ajanga Myanmar nung general tem summit tem nung adentsü memelar.

"Iba senden ya Myanmar dak dang rangloker amentsü aser tanga onük kecha mebenoktsü," ta ASEAN Secretary-General Kao Kim Hourn-i Reuters dang Malaysia nung Myanmar dak sendakba nung senden ana amentsü aliba indang ashi.

Kao Kim Hourn-i, senden nung sensak asemtsü aliba onüktem indangbo kecha mashi mesüra onük tasen benoktsü alia mali iba indanga kecha memetetdaksü.

Pai ashiba agi mezüngbuba senden nung tang, taoba aser taruba ASEAN chair nations; Malaysia, Laos aser Philippines densema alitsü. Tanabuba senden ya bloc indang foreign minister tem senden asütsü, ta pai ashi.

Küm ter shi rongsenketzüng nung temelenshi adoka yimsüsüa auba sülen 2021 küm military-i sorkar atsüngba ajanga Myanmar mepetmesü tului ai aser tang military-i parnok anema nokdakba telungpur telok balala aser pro-democracy resistance movement mazüoktetba ajanga mepetmesü tulu adoker lir.

Kasa mapang nung anüng ajanga civilian tem aliba tesem amakba densema tashiyim balala amshiba atema military ajj arudar.

Pakistan nung school bus ka amak; nisung pongu tepset

Islamabd, Monupii/May 21

(Agencies):

Pakistan nung southwest Balochistan province kübok Khuzdar district nung school bus ka amakba sülen tanur asem aser tain ana densema nisung pongu tepsetogo, ta military-i metetdaksü.

Khuzdar nung sorkar ketdangsür Yasir Iqbal Dashti-i ashiba agi, Bodhbarnü iba bus amakba sülen nisung 38 yiruogo.

"School bus ya Army Public School indang liasü aser anepdang tanurtem anidena aoba mapang pei temang nung bomb alenoker pokdaksürtemi maka liasü," ta pai Al Jazeera dang ashi.

Kasa mapang nung Balochistan Chief Minister, Sarfaraz Bugti-i osangbenertem den sensaksemba mapang ashiba agi, school bus nung nisung 46 mena liasü aser iba bus ya gari ka nung Improvised Explosive Device (IED) bener arua pokdakja liasü, ta bushisüngdang ajanga ngutetogo.

"Onoki kanga mejungi yirur aliba tanurtem Khuzdar nungi Quetta-i tayimtsü ajanga benerogo," ta Bugti-i Quetta yimti nung osangbenertem dang ashi.

Pakistan indang military-i iba bus amakba aitsüogo aser "Indian terror proxies" tem aitsüogo, ajisüaka parnok taitsüba nongittsü atema kuli kecha magütsü.

Ato Kilonser Shehbaz Sharif-ia, India-i teyari agütsüba kiralongrartemi iba bus amakba ya aitsüogo.

Sharif-isa, iba lendong nung asür kinungertem den asükhu lemsatepa liasü.

(Maneni tapak 8 nung...)

Malaysia Masters: Prannoy, Satish na tanabuba round-i iogo

Monupii/May 21, 2025

(Agencies): Asayar tejen H S Prannoy aser Kidambi Srikanth nati anir India nung asayartem Malaysia Masters badminton tournament kanga junga tenzükogo, saka PV Sindhu bo Bodhbarnü mezüngbuba round nung tsükatokogo.

Prannoy aser Srikanth na den Satish Karunakaran-a tanabuba round-i iogo.

Teburtemrongnungi Prannoy mezüngbuba asaya aser pai Japan nung fifth seed asayar Kenta Nishimoto19-21 21-17 21-16 agi koka liasü. Tena tsünga ghonda ka ser minute 22 asaya liasü. India nung asayar ya taruba asaya Japan nungersa Yushi Tanaka den asayatsü.

Karunakaran-ia kanga meranga asayar Chinese Taipei nung third seed asayar Chou

Tien Chen 21-13 21-14 agi minute 39 nung koka liasü. Pa tanabuba round nung France nung asayar Christo Popov den asayatsü.

Ayush Shetty-ia 20-22 21-10 21-8 agi Canada nung asayar Brian Yang akokba sülen tanabuba round-i iogo.

Bodhbarnüsa taoba mapang world no.1 asayar Srikanth-i China nung sixth seed asayar Lu Guang Zu 23-21 13-21 21-11 agi koka liasü.

Ajisüaka tetsükija asaya nung Sindhu bo maneni junga masayateti arudar aser la mezüngbuba round nung Vietnam tsür Nguyen Thuy Linh-i 11-21 21-14 15-21 agi tsükdaksüogo.

India nung tarep temeyoktep asayar Dhruv Kapila aser Tanisha Crasto nata

21-18 15-21 21-14 agi Indonesia nung tarep Adnan Maulana aser Indah Cahya Sari Jamil na akokba sülen tanabuba round-i iogo, saka India nung tanungba tareptem tsükogo.

Ashith Surya aser Amrutha Pramuthesh na atema Jiang Zheng Bang aser Wei Yaxin na kanga tashi tait liasü aser tenati asaya 10-21 12-21 agi mekoki liasü.

Rohan Kapoor aser Ruthvika Shivani Gadde nata China nung fourth seed tarep Guo Xin Wa aser Chen Fang Hui nati 10-21 14-21 agi tsükdaksüogo.

Maneni Karunakaran aser Aadya Variyath na Indonesia nung tarep Verrell Yustin Mulia aser Lisa Ayu Kusumawati nati 15-21 16-21 agi kokogo.

Bellingham tapu surgery agiba sülen season tetenzüklen masayatetsü

Monupii/May 21, 2025

(Agencies): Real Madrid aser England midfielder Jude Bellingham, Club World Cup asayaba sülen tapu surgery agitsü lir, anungji pa taruba season tetenzüklen hopta trokshi masayatetsü.

Arishi küm 21 tain asayar ya 2023 küm nungi tapu nung tashiba aliba agi timtema arudar aser Real-i pa tapu operation ya United States nung asayatsü aliba Club World Cup ya tembangba sülen agitsü telemtetba agiogo.

Taoba mapang Birmingham City midfielder, ya England aser par club nungi asayaba mapang tapu alepbanger asayar. Pa 2023 küm tatemlen Rayo

Vallecano den asayaba mapang tapu yiruba sülen pa Madrid aser England nungi asaya anana nung masayateti liasü.

Team 32 asayatsü aliba Club World Cup ya United States nung June 15 nungi July 13 tashi asayatsü lir.

Bellingham operation agiba sülen preseason ajunga aser season tasenba tenzükba sülen mezüngbuba hopta trokbo masayatetsü imlar aser iba tetezü pa England team Andorra aser Serbia den World Cup qualifiers asayatsü aliba nunga shilem magitetsü.

England coach Thomas Tuchel-i June ita Andorra den qualifier aser Senegal den friendly asayatsü aliba atema


Hokolbarnü England team sangdongtsü imlar, saka Club World Cup nung asayatsü aliba asayartem shimtsü meshimtsü mejangja.

Borussia Dortmund nungi pound million 115 agi alizükba sülen Bellingham ya Spain nung mezüngbuba season asayaba mapang kanga junga asaya liasü.

Madrid puri La Liga title aser Champions League akokba nung pai teyari tulu agüja asaya 43 nung goal 23 idakja liasü.

Taküm pai asaya 52 nung goal 14 dang idaktsü aser parnoki league title atema Barcelona memenep aser Champions League nunga quarter-finals nung Arsenal-i tsükdakja liasü.

Asayar ajemjang mesüra ni mapa toktsütsü: Guardiola



Pep Guardiola

Monupii/May 21, 2025

(Agencies): Manchester City-i taruba season nung squad nung asayartem majemtsüra pai manager mapa toktsütsü ta Pep Guardiola-i amokmerenogo. Asayartem aika masayadaksütsü ya pai temulung agi maremer ta ashi.

Mongolbarnü Bournemouth goal 3-1 agi akokba asaya nung Man City nungi asayar tejentem aika masayadaksütsüsa aküm aser Guardiola-i ashiba agi, asayar aika masayadaksüba agi pa mepelar.

Mongolbarnü asaya nung Abdukodir Khusanov, Savinho, James McAtee, Claudio Echeverri aser Rico Lewis nung ajak masayatet. Iba asaya akokba sülen City pur Premier League nung tasembuba jenjangi tuogo aser Champions League atema qualify asütsü asoshi point ka dang nüngdaker.

Guardiola nem team kümteftsü atema asayar aika agüjaka Spain nung coach yagi taruba season bo asayar ishiba den inyakner.

"Ni club dang squad tulu ka menügdaker ta shiogo. Ni asayar pongu trok freezer anung metoktsüner. Ni mapa toktsütsü. Squad ajemjang aser ni maotsü," ta pai ashi.

"Ni asayartem dang na masayatetsü ta ashitsü ya kü temulung agi maremer," ta paisa shisem.

Guardiola-i ashiba agi, City indang matchday squad nung

asayartem maneni meshimi toktsütsü ya tasak lir.

"Ita asem pezü onoki asayar 11 meshimtetli liasü, onok ket nung defender maliasü aser kanga tasak laisü. Iba sülen asayartem meyipa aru tenzük. Taruba season nungbo yamai mesütetsü," ta arishi küm 54 tain coach yagi ashi.

"Manager ka ama ni asaya 24 train mesütetsü aser ni asayar shimba shia asayar pezü, pongu, trok bo kidang Manchester nung dang atatsüsa akümer, kechiyong parnok masayatetsü. Ni club dang iba ya maginer ta shiogo," ta paisa shisem.

City-i January ita Khusanov, Omar Marmoush, Nico Gonzalez aser Vitor Reis nung pound million 200 intoka alizükogo aser 2024 küm alizüksang Echeverri-a River Plate nung loan nung oa asaya aliba meyipa aru.

BENDANGLI OSANG : Tapak 7 nungi...

Pakistan nung school bus ka amak...



Iba dak sendakba nung New Delhi-i kecha telangzüba magütsü.

Ketdangsürtemi ashiba agi, lendong nung asür timba akümtsü akok, kechiyong nisungtem kanga mejungi yirur lir.

Iba bus amakba ya tang tashi nung telok kati danga nangzüka mali.

Interior Minister Mohsin Naqvi-i, Khuzdar indang Zero Point anasa iba bus amakba aitsüogo aser asürtem atema mang ayimba lemsatepogo.

Balochistan province ya

alirongsen kanga takar tesem ka lir aser iba tesem nung sorkar aser nüjiso meshirtem küm aika rara arudar.

Balochistan nungsa Qillah Abdullah nung shishilembadak ka anasa nisung pezü tepsetba sülen Bodhbarnü iba lendong atalokogo.

Balochistan nung tesem balala amakba ya Balochistan Liberation Army (BLA)-i parnoki inyaker ta nangzüka arudar. Pakistan-i ashiba agi, iba telok nem India-i teyari agütsür, koba New Delhi-i magizüki arudar.

Russia tir Putin-i Kursk...

"Tesem balala meita aoba mapang Ukrainian special forces atema training camp ka nguteta liasü," ta ministry-i ashi.

"Coordinates agizükba dak ajemdaker Iskander missile ka iba tesem nung khalokja liasü," ta ministry-isa shisem.

Russia-isa, arem ka nung parnoki training camp ta ashiba tesem dak missile khaloktsüba video ka lemsatepogo.

Anüng nungi agiba video ajanga missile ka khaloktsüba sülen mi tuluka adoka mokozi temelem adokba sayuogo.

Maneni Russia-i ashiba agi, parnoki taoba ghonda 12 tsünga Ukraine-i yokba drone 159 khadangogo. Item drone tem ya Moscow densema tesem balala amaksü yokba liasü, ta military-i Bodhbarnü ashi.

Drone tem ya timba Ukraine den arrtsü nung aliba tesemtem amaksü atema yokogo aser item ya Mongolbar aonung aser Bodhbar anepdang yoka liasü, ta defence ministry sangdong ka ajanga metetdaksü.

Bodhbarnü Ukraine military-i ashiba agi, parnoki drone amshia Russia kübok Oryol tesem amakba mapang parnoki semiconductor device plant ka dak kongshiogo.

Iba plant yagi enterprises balala nem supply agütsür, kong Iskander aser Kinzhal missile tem yangluba densema lir, ta military-i Telegram ajanga ashiba den iba tesem yagi

drone 10 tonga ao aser mi adoka liasü.

Russia tir aser US tir Donald Trump na phone ajanga ceasefire dak sendakba nung sensaksem tamakok anguba sülen anogo ana lir iba ya ataloka liasü.

Europe nung lenirtemi ceasefire atema benokba agizüksü atema Moscow nongshia arudar.

Ukraine tir tir Volodymyr Zelenskyy-i, par linük maneni amaksü atema yimjung atema sensaksemtsü asoshi menomeyangdaksüba asoshi Kremlin aija arudar.

US Secretary of State Marco Rubio-i Mongolbarnü ashiba agi, Ukraine den ceasefire atema takhangbatem Russia-i anogo ishika tsünga metetdaksütsü imlar aser iba ajanga parnoki iba ken o süoki ia agir magir aji jangjatsü.

Putin indang war machine aser supply tezü raksatsütsü nükjidong nung United Kingdom-i Russia indang target 100 nem tenokdangba tasen agütsüogo. European Union-ia Russia nem tenokdangba 18buba agütsüogo.

Kasa mapang nung Canada-i Ukraine indang Minister of Finance Sergii Marchenko, iba hopta Banff, Alberta nung tejaoker ka ama G7 finance minister tem senden nung shilem agitsü jaokogo.

BILEMDANGANG

"Takümü anendaka malir saka ojen dang aoer."